

# Entschatta da semester a la scola auta da pedagogia dal Grischun

■ (cp) 148 studentas e students da tschintg chantuns svizzers e dal Principadi da Liechtenstein èn s'annunziads il semester d'atun 2014/15 per il studi sco persuna d'instrucziun per la scola primara e per la scolina a la Scola auta da pedagogia dal Grischun (SAPGR). Cun questas annunziadas è il dumber da personas che entschaivan il studi dapli che

sa dublegià dapi la fundaziun da la SAPGR avant indesch onns. Actualmain ha la SAPGR enturn 425 studentas e students en ils dus studis da bachelor per la scola primara e per la scolina. Plinavant porscha la SAPGR studis da master en ils secturs stgalim secundar I e pedagogia curativa da scola che vegnan frequentads da 55 studentas e students. Quai maina pu-

spè ad ina utilisaziun maximala da l'infrastructura da la SAPGR.

## Studentas e students cun differentas prescolaziuns

En il studi per la scola primara è la cumpart dals umens tar 24% ed uschia sur la media svizra (funtauna: UFS). La cumpart da studentas e students cun ina maturitad (maturitad gimnasiala u maturitad spezialisada en pedagogia) per domadus studis è tar radund 58%. Er en la nova annada da studi datti dentant era numerusas personas da professiun che vegnan a la SAPGR via maturitad professiunala e curs preparatoric.

## Svilup legravel

Ins dastga spetgar che quest svilup legravel vegn a cuntinuar er en avegnir. Il dumber d'annunziadas per il curs preparatoric mussa che numerusas Grischunas e Grischuns sco era studentas e students d'auters chantuns s'interessan per la scolaziun sco mussadra da scolina resp. sco persuna d'instrucziun per la scola primara a la SAPGR. Cun quai èn las cundiziuns dadas per correspunder als basegns persunals da las scolas en il chantun Grischun.



La SAPGR porscha studis da master en ils secturs stgalim secundar I e pedagogia curativa da scola.